

Մամլոյ Հաղորդագրութիւն

Հ.Բ.Ը.Մ.-Ը ՌԻՍՈՒՄՆԱԿԱՆ ԴՐԱՄԱՇՆՈՐՀՆԵՐ ԿԸ ՏՐԱՄԱԴՐԷ ԼՈՅՍ ՀԻՄՆԱԴՐԱՄԻ ԼՈՒԾԱՐՄԱՆ ՊԱՏՃԱՌՈՎ ՏՈՒԺԱԾ ՌԻՍԱՆՈՂՆԵՐՈՒ

Անմիջապէս Հրատարակութեան Համար

7 Օգոստոս 2018 - Երեքշաբթի օր Հ.Բ.Ը.Մ.-ը յայտարարեց, թէ Վարչապետի տիկնոջ՝ լրագրող, քաղաքական գործիչ Աննա Յակոբեանի նախաձեռնած «Իմ Քայլը» Բարեսիրական Հիմնադրամին հետ համախորհուրդ, ուսումնական դրամաշնորհներ պիտի տրամադրէ այն ուսանողներուն, որոնք տուժած էին «Լոյս» Հիմնադրամի լուծարման պատճառով: Աշխարհի լաւագոյն տասի շարքին դասակարգուած համալսարաններու կողմէ ընդունուած այդ ուսանողները, իրենց ուսման ընթացքը շարունակելու համար վստահած էին «Լոյս» Հիմնադրամին կողմէ իրենց խոստացուած դրամաշնորհներուն:

«Լոյս» Հիմնադրամը, որ ստեղծուած էր Հայաստանի նախկին ղեկավարութեան բանալի դէմքերու կողմէ, նոր կառավարութեան կազմութենէն ետք լուծարած էր ինքզինք: Իբր ոչ-շահամետ կազմակերպութիւն գործող այդ հիմնադրամը ատենին ստեղծուած էր սատարելու համար աշխարհի լաւագոյն համալսարաններու մէջ բարձրագոյն ուսման ձեռքբերումին ձգտող հայ յառաջադէմ ուսանողներու, որոնք հետագային, իրենց կարգին պիտի նպաստէին Հայաստանի մրցունակութեան զարգացման՝ տարբեր բնագաւառներու մէջ իրենց ներգրաւումով:

Վարչապետի տիկնոջ հովանաւորած «Իմ Քայլը» Հիմնադրամին առաքելութիւնն է սատարել այն խնդիրներու լուծման որոնց կառավարութիւնը չի կրնար անմիջականօրէն հասնիլ: Անոր որդեգրած գործելաձեւը հասարակական ծրագիրներու համար տրամադրելի նիւթական տարբեր աղբիւրներու յայտնաբերումը եւ համապատասխան ծրագիրներու հետ անոնց կամրջումը եւ համակարգումն է: Անշուշտ Տիկին Յակոբեանի համար նախատեսելի չէր, որ հիմնադրամին դիմաց ծառացող առաջին խնդիրը «Լոյս» Հիմնադրամի լուծարման պատճառով դժուարութեան մատնուած ուսանողներու պարագան պիտի հանդիսանար, որոնք իրենց 2018-2019 տարեշրջանը սկսելու պայմանաժամը կը դիմագրաւէին: Ան անմիջապէս աջակցութեան կոչ ուղղեց միջազգային շրջանակներուն: Հ.Բ.Ը.Մ.-ը չուշացաւ ընդառաջելու կոչին, կրթաթոշակներու համար տրամադրելով 200,000 ամերիկեան տոլարի գումար մը, ստանձնելով նաեւ ուղղակի կերպով վարչական ձեւակերպութիւնները դասաւորելու պատասխանատուութիւնը համապատասխան համալսարաններու հետ, որոնց շարքին՝ Օքսֆորտի, Քեմպրիճի եւ Շիքսօի համալսարանները:

Հ.Բ.Ը.Մ.-ի Նախագահ Պերճ Սեդրակեան նշեց, թէ Հ.Բ.Ը.Մ.-ի այս յատուկ եւ բացառիկ աջակցութիւնը կը բխէր այն համոզումէն, որ յառաջադէմ ուսանողներ պէտք չէ զրկուէին իրենց երազներու իրականացման պատեհութենէն, իրենցմէ անկախ պայմաններու դժբախտ

դասաւորումին պատճառով: Ան գնահատեց «Իմ Քայլը» Հիմնադրամի կոչը՝ որով ան դիմած էր համապատասխան կազմակերպութիւններու աջակցութեան, նաեւ շնորհակալութիւն յայտնեց Միութեան ուսումնասէր բարերարներու առատաձեռնութեան համար, որուն շնորհիւ կարելի եղած էր ապահովել անհրաժեշտ գումարներու ապահովումը:

Տիկին Յակոբեան շնորհակալութիւն յայտնեց Հ.Բ.Ը.Մ.-ին, անոր արագ եւ ազդու արձագանգումին համար: «Հ.Բ.Ը.Մ.-ի կողմէ տրամադրուած աջակցութիւնը, պարագաներու բնական դասաւորում մըն է անկասկած:» ըսաւ ան, «տրուած ըլլալով որ Միութիւնը տասնամեակներու ընթացքին հազարաւոր կրթաթոշակներ տրամադրած է հայ ուսանողներու: Անշուշտ Հ.Բ.Ը.Մ.-ը գիտակից է նաեւ, որ փայլուն ուսանողներու այս խումբը՝ տնտեսական զարգացման մարզերու մէջ Հայաստանի մրցունակ դիրքի ապահովումին ուղղութեամբ կարելոր ներդրում մը կը հասնողիսանայ: Մենք երախտապարտ ենք Միութեան, որ իր արագ արձագանգումով կրկին անգամ հաստատեց կրթութեան նկատմամբ իր լուրջ յանձնառութիւնը:»

Մինչ «Իմ Քայլը» Հիմնադրամի նախաձեռնութեան շնորհիւ այս պարագային կարելի եղաւ ստեղծուած կացութեան համար արագ եւ նպաստաւոր լուծումի մը յանգիլ, սակայն հետագային արժանաւոր ուսանողներու բարձրագոյն ուսման կրթաթոշակներու ապահովումին համար անհրաժեշտ է ստեղծել համապատասխան կայուն ծրագիր:

Հիմնուած 1906-ին, Հ.Բ.Ը.Մ.ը (www.agbu.org), աշխարհի մեծագոյն ոչ-շահամէտ հայկական կազմակերպութիւնն է: Միութեան կեդրոնը կը գտնուի Նիւ Եորք, Ամերիկայի Միացեալ Նահանգներ: Հ.Բ.Ը.Մ.ը կը սատարէ հայեցի ինքնութեան եւ ժառանգութեան պահպանումին եւ մշակումին՝ կրթական, մշակութային եւ մարդասիրական ծրագիրներով: Միութեան գործունէութիւնները կ'ընդգրկեն տարեկան աւելի քան 500,000 հայեր, աշխարհի տարածքին:

Հ.Բ.Ը.Մ.ի եւ անոր համաշխարհային ծրագիրներուն մասին տեղեկութիւններու համար այցելեցէք www.agbu.org կայքէջը:

ԼՈՒՍԱՆԿԱՐՆԵՐ

agbu-luys-08-07-18.jpg: Աննա Յակոբեան Երեւանի մէջ կայացած մամլոյ ասուլիսի ընթացքին կը յայտարարէ կրթաթոշակներու կապակցութեամբ «Իմ Քայլը» Հիմնադրամի նախաձեռնութիւնը: Photo Credit: panorama.am

Յաւելեալ Տեղեկութեանց համար - Կապ

AGBU Press Office

55 East 59th Street

New York, NY 10022-1112

Phone: 212.319.6383

Email: communications@agbu.org